

Shilwa sha Moyo



Sano
(Machi)

Nghilili na mimbo ga
Ng'wigulu
mu Kisukuma

(Mistari na nyimbo kwa Kisukuma
kuhusu Mbinguni)





I

Yaya ū kwibīkīja mu sī ī sabo jing'we, nguno
jidūgije kūkenaagūlwa fufuuji nūlū būbozu;
nūlū basambo badūgije kūkambūla būjiiba.
Alīyo jibīkagi ng'wigūlū, ūko jitūdūla kū-
kenaagūlwa fufuuji nūlū būbozu; hama
nūlū basambo batadūgije kūkambūla na
kwiba.

Matayo 6:19, 20

**Seba, natūshitogwa feza na zahabu,
Natogilwe kūmana ndī ng'widale lyako,
Mu kītabo cha bela mu būtemi wako,
Lina lyane, niwīle, angū, lyandīkwa mo?**

*Angū, lyandīkwa mo mu būtemi wako?
Mu kītabo cha bela, angū, lyandīkwa mo?*

199.1 Seba, Natūshitogwa Feza Na Zahabu

Jina langu limeandikwa (Sifa #78)
(Is My Name Written There?)



2

Nani ndī nanghwe ng'wigūlū?
Na mu sī kītī ho kīnhū cha kūniyeja
ūlū ūtī Bebe.

Zaburi 73:25

Bing'we ba Yesu, munamyē Ntemi,
Munkumūche We ng'wigūlū na sī.
Lūkumo lwa Yesu lūtang'anhage;
Mahanga, machalo gankūjage We.

Ng'wigūlū na sī, alīsuga We,
Būtemī wakwe būtī hose pye;
A bose ng'wigūlū būngongola no.
Būnūmba welelo būtalashila.

40.1 Ba Yesu Munamyē Ntemi
(O Worship the King)



3

[Yesu alihaya giki,] "Ū mu kaya ya ng'wa Ba-
ba bŭlŭmo wikalo wingi; ūlū ni itī chene
ni naamuwilile. Nalija kŭmulonja longēja
ipandī! Hūna lūulū iki nalija kŭmulonja
longēja ipandī, nakwiza hangī namusole na-
mutwale ūko nalī ū nene, ibize giki aho nalī ū
nene na a bing'we mŭbize henaho."

Yohana 14:2, 3

**Aho bakwe balajūka kŭlwa ilaka lyakwe,
Balashika kwikala ūko alī;
Aho balabona kaya yabo ūko ng'wigŭlū,
Nene nalabiza ko hamo nabo.**

*Nalabiza hamo nabo
Aho alitana bakwe,
Būyegi bŭtale nīyo!
Nene nalabiza ko hamo nabo.*

174.2 Aho Yesu Seba Wiswe Alashoka

Bwana Yesu atakaporudi (Sifa #114)
(When the Roll is Called Up Yonder)



4

Batogwa, ī haha tūlī baana ba ng'wa
Mulungu, kwike gūtaalī ū koolechiwa hape
ūmo tūkūbizīla; alīyo tūmanile dūhū gīkī ūlū
oolechiwa tūkūbiza gīt'ūmo alī ū wei, nguno
tūkūmona ūmo alī gete.

1 Yohana 3:2

Mu miso gakwe, kīgongo!
Nalabīza gītī We,
Mu būtūngīlīja wakwe
Ndazwalīchiwa nene.

Būshū wakwe nalabona,
Ū būshū wikūjo no,
Aho ndaja kūnsūng'anha,
Higūlya kwinunga no.

181.3 Mu Miso Ga Mpīja Wane
(Face to Face)



5

Alīyo [Stefano] walī akalalīlile ng'wigūlū
kūnū okalaga Moyo Ng'wela, ūlībona ī likūjo
l̄ya ng'wa Mulungu, nū Yesu wīmīlaga kū
nkono gwa būlyo go ng'wa Mulungu.

Shītwa 7:55

Tūjagi, bazunya,
Abantogwa Yesu,
Tūng'wimbīle na būyegi,
Tūng'wimbīle na būyegi,
Kwisumbī lyela no,
Kwisumbī lyela no.

Tūlīja (ko) ng'wigūlū,
Bīswe abakomolīlwe,
Tūlīja tūlīlolela (ūko)
Wikalo wa Seba wiswe.

228.1 Tūjagi, Bazunya
Twenenda Sayuni (Sifa #108)
(We're Marching to Zion)



6

Nguno tūmanile gīkī, ī numba yise ī ya mu sī
ūlū yūsambagūlwa, tūlī na numba ya kūfuma
kūlī Mulungu; numba ya ng'wigūlū ya būja na
būja, īyo ītī ya kūbeejiwa na makono.

2 Bakolinto 5:1

Twīte nimo haha na makono giswe,
Ng'wikanz' ido tūkūja kaya,
Kīgongo chakwe chene nguzu kū biswe,
Ng'wikanz' ido tūkūja kaya,

*Kakanza kado, kakanza kado,
Twīnge mo mu mahuli,
Tūmanhye nanghwe aho shikū jūshila,
Ng'wikanz'ido tūkūja kaya.*

245.2 Ng'wimbīle Lyīmbo
(In a Little While)



7

Hūna a banhū ba mahanga gose, bakwīmīla
kū būtongi bokwe. Nanghwe akūbakomanya
gītūmo ndīmi akakomanījaga ngholo na
mbūli.

Matayo 25:32

**Nzū kūlī Yesu, angūhaga!
Kūcha na nsango shegelaga;
Ni halī lūlū ibūngīlo ūlū itī mu Yesu?**

*Kūlabi kūyega ng'wigūlū,
Aho bakwe balashika ko;
A bela bose būng'wīmbila tīkī bapījiwa.*

92.4 Nzū Kūlī Yesu

Twende kwa Yesu (Sifa #167; Tenzi #38)
(Come to the Saviour)



8

Ha nūma ya henaho, aho nataalī nalolile
nūbona ibita lya banhū itaale no, atīho nūlū
ūmò ūyo adūgije kūbasolooja; baalī ba
kūfuma mu mahanga gose, na ng'anda jose,
ba ndūgū jose na ndīmi jose. Baalī bīmīlile ū
kū būtongi wī Isumbī lya būtemi, nū kū
būtongi bo Ng'wana wa Ngholo, bazwalile
shizwalo shape. Ū mu makono gabo baali
babūkije matambī ga mitī ya nhende.

Kūkundūlwa 7:9

Ali bing'we, ū kwenūko,
Mukūjaga kwīta kī?
Twaja kaya ya ng'wa Yesu,
Ūko kwene kwa wiza,
Tūlamona Mpīja wiswe,
Tūlikala mu kwitogwa,
Tūlikala hamo nanghwe,
Shikū jitalashila.

106.2 Bashimīnzi, Ng'waja Halī
(Whither Pilgrims?)



9

Balī na lubango abo bafulile shizwalo shabo,
gīkī banukūle būdūla bo kūbiza na ngabo ū
kū ntī gwa būpanga, hama badūle kūbīta a ha
mibita, bingīle ū mu nzengo.

Kūkundūlīlwa 22:14

**Ndī na shizwalo shing'wekung'weku nīyo,
Shilīnilindīla ng'wikūjo ūko,
Nalashanukūla aho ndashika kwene,
Nū bebe, ndībūja, ūlashisanga?**

*Nalīkūlombela, nalīkūlombela,
Nalīkūlombela ūmane We Mpīja.*

204.3 Nalī Na Mpīja Alīlomba Ng'wigūlū

(I Have a Saviour, He's Pleading in Glory)



10

Nūlola kūshisha masumbī ga būtemī
gūtūūlwa ho, na Namhala wa shikū wigasha
ho ... Mongo gītī moto gūfuma kūlī Wei,
gūbīta mu būtongi wakwe: shikū na shikū
būbyūng'winhītīja, na shikū ikūmi nghanjala
shikū ikūmi balī bīmīla mu būtongi wakwe: na
kūlekanya kwatūūlwa ho, na shitabo nasho
shūkundūlwa.

Danieli 7:9a, 10

Ng'wela, Ng'wela, Ng'wela!
Bela bose bīmba,
Bīmīla bapīndije isumbī lyako;
Bamalaika bose būkūkumītīja,
Kale na kale, ūlī Mulungu.

46.2 Ng'wela, Ng'wela, Ng'wela
Baba, Mwana, Roho (Sifa #6; Tenzi #6)
(Holy, Holy, Holy)



II

Nguno a bing'we mutizile kũ lūgūlū ūlo
lūdūgije kũkūumiwa, gītī ūlo lwabakaga
moto, mutizile kũ giiti na būpi, nūlū kũ
nyaga ntaale... A bing'we ng'wizile kũ lūgūlū
lo Sayuni, kũ nzengo go ng'wa Mulungu
mpanga, Yelusalemu ya ng'wigūlū; kũ būhī na
būhī bo bamalaika.

Bahebulania 12:18, 22

Nkumīlīji bamalaika,
Ū kwisumbī lyela ng'wigūlū,
Na mu sī mung'wimbe bose pye,
Nzūgwi tūyegele.

*Tūlankūja, tūlankūja,
Ū mu nzengo ng'wela tūnkūje,
Tūlankūja ū We
Ntemi wa batemi.*

60.2 Nkumīlīji, Nkūjagi Ntemi
(*Crown Him King*)



12

Hūna nūbona, hama nīgwa n'ílaka itaale lya bamalaika baalī balīpīndije ī Lisumbī lya būtemi, nī Shiseeng'wa shipanga na a Banamhala. Ī lisaabu lyabo baalī būhī na būhī, makūmi ga mashihūmbī, nghanjala mashihūmbī makūmi! Bahamukaga n'ílaka itaale balīhaya gīkī, "Ū Ng'wana wa Ngholo ūyo walī wasīnzwa igeleelilwe kwanukūla būdūla na būsabi na masala, na nguzu. Hangī igeleelilwe ikūjo na kūgongoolwa, na kūkumīlījiwa!"

Kūkundūlilwa 5:11, 12

**Ng'wigūlū na sī, alīsuga We,
Būtemi wakwe būlī hose pye;
A bose ng'wigūlū būngongola no,
Būnūmba welelo būtalashila.**

40.2 Bing'we Ba Yesu Munamyē Ntemi

Watu wa Yesu (Sifa #1)

(O Worship the King)



13

Hūna niigwa ilaka kūfuma nòg' wigulū līlhaya,
"Andīkaga gīkī, 'Balī na lubango a bafu abo
balīchīla mulī Seeba kwīngīla haha;
Alichene, alīhaya Moyo; gīkī bifuule ū mu
milīmo yabo ī ya makoye, nguno ī shītwa
shabo shikūbiza hamò nabo!"

Kūkundūlīlwa 14:13

Kūlī ho kwifula kū būlī nzunya pye,
Ng'wikanz' ido tūkūja kaya,
Kū nzengo ng'wela shisoji shitūbi ko,
Ng'wikanza' ido tūkūja kaya.

*Kakanza kado, kakanza kado,
Twīnge mo mu mahuli,
Tūmanghye nanghwe aho shikū jūshila,
Ng'wikanz' ido tūkūja kaya.*

245.4 Ng'wimbīle Lyīmbo
(In a Little While)



14

Hangī niigwa ilaka gītī ly'ibita itaale, gītī
ng'huutumo gwa minzi mingī, gītī kūpalalūka
kūtaale; nūliigwa līlhaya, "Halelūya, nguno ū
Seeba Mulungu wise, ū wa būdūla bose, hū
ng'wene ū Nsugi! Tūyegagi tūsangabale,
tūng'winhagi ikūjo, nguno lyashikaga ī
likanza lya būtooji bo Ng'wana wa Ngholo,
nū Ntoolwa wakwe amalīlile."

Kūkundūlīlwa 19:6, 7

**Mung'wimbīlage, mungongolage
Uwigelile ikūjo lyose,
Būtogwa na nguzu mung'winhe Ūyū,
Nkomoji, Nombeji, na Ntemi, Yesu.**

40.5 Bing'we Ba Yesu Munamyē Ntemi

Watu wa Yesu (Sifa #1)

(O Worship the King)



15

Banhū bakūfuma kīya na ng'weli, bangī
sukuma na dakama bize bigashe kūlya
shilīwa ū mu būtemi bo ng'wa Mulungu.

Luka 13:29

Ū kūfuma sī jose balīja ko,
Bazunya bose pye,
Ū kū kaya ya Seba ū ng'wigūlū,
A bela pye.
Shose shakwe tūlashisanga ko,
Shimalīlile shatūlindīlaga
Na mīenda yape na ya wiza no,
Tūlapandīka ko hamo na Yesu.

*Kū kaya ng'wigūlū,
Bazunya bose balīja ko,
Kū kaya ng'wigūlū,
Būyegi no.*

252.1 Ū Kūfuma Sī Jose Balīja Ko
Wanatoka dhambini (Sifa #144)
(*Gathering Home*)



16

Ū wa kūpyena akūzwalīkwa shizwalo shape
gīko, hama natūlījīmya na hado yaya ī lina
lyakwe ū mu shitabo sha būpanga; na hangī
nakūlīkaanīla hape ī lina lyakwe ū kū būtongi
bo ng'wa Baba, nū kū bamalaika bakwe.

Kūkundūlīlwa 3:5

Mu ikūlū itale galī ko manumba,
Balī ko bakomolwa mu shizwalo shape,
Būbi būtalingīla wa kūbihya wela,
Lina lyane, E, Seba, nghana lyandīkwa ko!

*Nghana lyandīkwa ko
Mu būtemi wako,
Mu kitabo cha bela,
Nghana lyandīkwa mo!*

199.3 Seba, Natūshitogwa Feza Na Zahabu

Jina langu limeandikwa (Sifa #78)

(Is My Name Written There?)



17

Hūna ūmò wa Banamhala ūlūngalūnga; ūniwīla gīkī, "Banani abo bazwalile shizwalo shape benaba, na hangī bafumile halī?" Nane nūng'wīla, "Seeba wane; ū bebe h'ūyo ūmanile!" Hūna ūniwīla gīkī, "A benabo hū bene abo bafumile mu būluhiwa ū būtaale; ī shizwalo shabo baashifula mu mininga ga Ng'wana wa Ngholo."

Kūkundūlīlwa 7:13, 14

**Wa kūnzunya Yesu ūbi na mhola,
Weejiwa na mininga gakwe;
Na kīgongo chakwe wisagīlilwe,
Ojiwa na mininga gakwe.**

***Nojiwa na mininga,
Mininga ga Yesu Nkomoji,
Moyo gwane gwabizile gwape no,
Nojiwa na mininga gakwe.***

89.1 Wa Kūnzunya Yesu

Wamwendea Yesu (Sifa #125)
(*Are You Washed in the Blood?*)



18

H'ī nguno yene balī kū būtongi wī Isumbī lya
būtemi lya ng'wa Mulungu, bakūntūmamīlaga
līmi na būjikū mu hekalu yakwe. Nanghwe
ūyo igashije hī Isumbī lya būtemi
akūbafīkīja n'iheema lyakwe.

Kūkundūlīlwa 7:15

**Kūlwa īyī, nakūntūmamīla Seba wane gwa,
Hūnkumūcha mu miso ga bose pye,
Īkī namanile gīkī, ūko alabiza ko,
Nene nalabiza ko hamo nanghwe.**

*Nalabiza hamo nabo
Aho alitana bakwe,
Būyegi būtale nīyo!
Nene nalabiza ko hamo nabo.*

174.3 Aho Yesu Seba Wiswe Alashoka

Bwana Yesu atakaporudi (Sifa #114)
(When the Roll is Called Up Yonder)



19

Batalatuuba hangī, nūlū nota batalakolwa,
nūlū līmi litalaboocha, pyī nūlū miyaga
yose yose italabakoya hangī. Nguno ū
Ng'wana wa Ng'holo ūyo alī ha gatī yī Isumbī
lya būtemi, akūbadīma na kūbatongeela kū
nzwinzī ja minzī mapanga. Ū Mulungu
akūshipyagūla ī shisoji shīnge pyī ū mu miso
gabo."

Kūkundūlīlwa 7:16, 17

Būtūbiza būjikū ūko,
Yesu ng'wene isana lyabo,
Shilashila shisoji shose,
Būkanīji ūbū wa nghana.

*E, Yesu Ntogwa no,
Tūlabona Bebe ng'wigūlū,
E, Yesu Ntogwa no,
Tūlabona Bebe ng'wigūlū.*

177.4 Hīgwa Mhayo Gwa Sī Ya Wiza
(In the Sweet By and By)



20

Ū ise būgonzo ūng'wīla, "Būgatū ū bebe ūlī
nsese wawiza na ntūngīlīja. Īkī wabizile
ng'wishigwa mu shigehu nakūkūtūūla higūlya
ya shikolo shingī, ingīlaga mu būyegi bo
ng'wa so būgonzo."

Matayo 25:21

Sha kūkumya, būyegi wingī,
Kwigwa Mhayo gwakwe ū Nfemi,
Aho ūbitana banhū bakwe,
"Ng'wingīle mu būyegi wane."

*Būyegi kūwīlwa,
Balī kū nkono gwa kūlīla,
"Nzūgwi, nzūgwi,
Ng'wingīle wingīji wa welelo."*

33.4 Ū Lūshikū Lwa Kwiza Yesu



21

Hūna nūbona igūlū ipya na sī mhya; nguno ī
ligūlū lya kwandya nī sī ī ya kwandya shalī
shamala kūbīta, nī nyanza yalī ītīho hangī.
Kūkundūlīlwa 21:1

Bashimīnzi, ng'waja halī?
Mulolile chalo kī?
Biswe nghana, numho chene,
Tūlī nalo lūgendo.
Twigwa gīkī, sī ya wiza,
Nghana, īlī ko ng'wigūlū;
Tūkitanwa na Mulungu,
Hūna kwene twaja ko.

106.1 Bashimīnzi Ng'waja Halī
(Whither Pilgrims)



22

Akūshipyagūla ī shisoji shīnge pyī ū mu miso gabo, na kūtalabiza ho kūcha hangī, nūūlū būpīna, nūūlū ng'hūngū; pye nūūlū kūluha kūtalabiza ho, nguno ī ya kwandya ikūbiza yamalaga kūbīta."

Kūkundūlīlwa 21:4

**Ūlū tūnzunya Yesu,
Mu sī twīt'ilundu no,
Lītī ko ng'wigulu.**

*Kūlabiza kūyega,
Mhola nīyo, na kwifula,
Kūlabiza kūyega
Ng'wigūlū kūlī Yesu.*

179.1 Ūlū Tūnzunya Yesu
(Joy to Come)



23

Būtūbiza ho būjikū na hado yaya, na it̄ho nguno ya kūbiza na būpe bo talà nūūlū bo līimi, nguno ū Seeba Mulungu ng'wenekīlī h'ūyo akūbiza Isana lyabo, bakūsuga shikū ja shikū jose.

Kūkundūlīlwa 22:5

Būtūbiza būjikū ūko,
Yesu ng'wene isana lyabo,
Shilashila shisoji shose,
Būkanīji ūbū wa nghana.

*E, Yesu, Ntogwa no,
Tūlabona Bebe ng'wigūlū,
E, Yesu, Ntogwa no,
Tūlabona Bebe ng'wigūlū.*

177.4 Hīgwa Mhayo Gwa Sī Ya Wiza
(In the Sweet By and By)



24

Balī na lubango abo bafulile shizwalo shabo,
gīkī banukūle būdūla bo kūbiza na ngabo ū
kū ntī gwa būpanga, hama badūle kūbīta a
ha mibita, bingīle ū mu nzengo.

Kūkundūlīlwa 22:14

Abamala kūnzunya Yesu
Balayega kīhamo nanghwe,
Alīyo mhayo gwa Seba wabo
Gūlapeja kogoha kwabo.

*Būyegi kūwīlwa,
Balī kū nkono gwa kūlīla,
"Nzūgwi, nzūgwi,
Ng'wingīle wingīji wa welelo."*

33.3 Ū Lūshikū Lwa Kwiza Yesu



25

Hūna lūlū ū mīlī gwa kūkenangūka gwenūyū
ūlū gūzwala bütūkenangūka, ū gwa kūcha
gwenūyū gūbiza gwazwala bütūcha, a henaho
gūkūbiza gwashikīla ū mhayo ūyo
gwandīkilwe gīkī, "Ū lūfu lwamilagwa na
būpyeni."

1 Bakolinto 15:54

Aho kūcha kūlegela,
Tūlekage kogoha,
Lūfu lose na kīgila,
Washipyenile Yesu;
Niswe tūlapyena īsho,
Tūlajūka gītī We,
Īkī tūlī būmo nanghwe,
Ndūgū wiswe ū Yesu

130.4 Tūlī Na Ndūgū Wa Nghana

Yesu kwetu nī tafiki
(*What a Friend We have in Jesus*)



26

Nguno ū Seeba ng'wenekilī akwiza kūfuma
ng'wigūlū n'ilaka itaale lya kūlagīla, ilaka lya
ng'wa malaika ntaale, n'ipembe lya ng'wa
Mulungu; hūna abo baachīla mulī Kilisito
bakūtonga ū kūjūka. Ha numa nise abo
tūkūsangwa tūtaalī tūlī bapanga,
tūkūhwehulwa hamò nabo tūje mu malunde
kūjūmanhīja kwigūlya nū Seeba. Hūna
tūkwikala nanghwe ū Seeba welelo bose.
1 Batesalonike 4:16, 17

**Aho ū Yesu aliza hangī, līmi nūlū būjīku,
Akūtūpandīka tūlī miso, tala jiswe jakile?**

*Angū, ng'wichane, ūlī tayalī,
Wamalīla kūja ko?
Kū kaya jiswe ng'wigūlū ūko,
Angū, ūnindīlile nghana?*

28.1 Aho Ū Yesu Aliza Hangī
Atakaporudi tena Yesu (Sifa #115)
(When Jesus Comes)



27

Alīyo a batūngīlīja, bakūbiza ba kūng'weka
ng'weka gītī līimi ū mu būtemi bo ng'wa
Saabo. Ūyo alī na matū ni igwage.

Matayo 13:43

**Mu miso ga Mpīja wane,
Nalamana gītī We,
Ndabona ikūjo lyakwe
Kūlwa būtogwa wakwe.**

*Būshū wakwe nalabona
Ū būshū wikūjo no,
Aho ndaja kūnsūng'anha,
Higūlya kwinunga no.*

181.1 Mu Miso Ga Mpīja Wane
(Face to Face)



28

Mu lūshikū lwenūlo gūlahayiwa gīkī, Lolaga,
Ūyo hū Ng'wene Mulungu wiswe, Ūyo twalī
tūnindīla gīkī, atūpīje; hū Ng'wene Yehova
Ng'wenūyū twalī tūnindīla, tūsangabale na
kūbūyegela būpīji wakwe.

Isaya 25:9

Ūko tūlayegela kīhamo na
Bazunya bose pye,
Aho milīmo yose ilashila,
Twifula ko,
Ī mīongo ya minzī a mapanga.
Īkūselaga gwa welelo bose,
Nūlū tūtalakolwa nota ūko,
Īkī tūlagang'wa minzī mapanga.

*Kū kaya ng'wigūlū,
Bazunya bose balīja ko,
Kū kaya ng'wigūlū,
Būyegi no.*

252.2 Ū Kūfuma Sī Jose Balīja Ko
Wanatoka dhambini (Sifa #144)
(*Gathering Home*)



29

Ū wei ū Moyo akakaanīlaga hamò nī myoyo
yise gīkī tūlī baana ba ng'wa Mulungu. Nose
ulū tūlī baana, hū kūhaya tūlī bingīji, bingīji
ū kūlī Mulungu, bingīji hamò nanghwe ū
Kilisito; ulū tūluhiwa hamò nanghwe, gīkī nū
kūgūngūhiwa tūlagūngūhiwe hamò nanghwe.

Balumi 8:16, 17

**Kūshisha aliza We, na ikūjo lyakwe pye
Kwisagīja kwenūkū kūtūlūngūje bose,
Aho twīyiganika, kaya yiswe kwenūko.**

**Kūshisha aliza We, tūtizīta bupīna,
Aho abantogwa We bingīla kwifula ko,
Tūkwibona na bose abachīla mūlī We.**

30.1,2 Kūshisha Aliza We

(Till He Come)



30

Nguno ū būluhi bo haha būlī būbbūpu no,
hama būkūtūbeegejaga ikūjo lya būja na
būja, ilo līlī na mpango ntaale kūtinda.

2 Bakolinto 4:17

Kū nguno basolwa kūbiza bela,
Kūlw'īyo būyega, būngongola no,
Ūwaatūkomola mu nsango gose,
Ikūjo tūng'winhe shikū welelo.

178.3 Mu Miso Ga Yesu
(To God be the Glory)



31

Ū Nkaanīji wayo ī mihayo yenīyī alihaya, "Ee,
naliza wangū." Alichene, nzūgū Seeba Yesu.
Kūkundūlīlwa 22:20

Ū lūshikū lwa kwiza Yesu,
Lwa kogohya na ng'wano ntale,
Bamalaika na bela bose
Balimba na būyegi wingī.

*Būyegi kūwīlwa,
Balī kū nkono gwa kūlīla,
"Nzūgwi, nzūgwi,
Ng'wingīle wingīji wa welelo."*

33.1 Ū Lūshikū Lwa Kwiza Yesu



Wasaidizi: M. B. Luhaga, M. S. Masanagulilo,
G. M. Bundala, M. S. Ipimilo
Mratibu msaidizi: S. Nkoma Ngallaba
Mratibu na mhariri: N. Glock
Mchoro katika kitabu hiki: I. D. Mashauri (IKIGO)

Sano
(*Machi*)
Nghĩĩĩĩ na mĩmbo ga
Ng'wigũlũ
mu Kisukuma
(*Mistari na nyimbo*
kwa Kisukuma kuhusu
Mbinguni)

Mistari ya Agano la Kale imetolewa kutoka
Shandikwa Shela Sha Mulungu
ishilikwa giki *Biblia* ©1960
Mistari ya Agano Jipya imetolewa kutoka
Ilagano Ipya, Nghũlũ Jawiza kũ Banhũ Bose ©2000
Imetumika kwa kibali cha
Chama cha Biblia Tanzania
P.O. Box 175, Dodoma, Tanzania

Nyimbo zimetolewa kutoka
Mimbo (Kisukuma)
Imetumika kwa kibali cha
Inland Publishers
Haki zote zimehifadhiwa ©1987

© Wycliffe Inc. 2011
Kimechapwa na
Elimu ya Kikristo AICT
Mwanza, Tanzania
Oktoba 2011